

AGENDRE TRINITATIS

MINGGU 21 SEPTEMBER 2025

1. FANGOWAI BA FOGAONI

(Tedöni dorosi , möi ndra sohalöwö bakha ba gosali, ba lahalö wangahono dödö banua niha Keriso ba wangondrasi ba ba wasumangeta khö Lowalangi).

- Fangowai** :
SA : Ya'ami banua Zo'aya, Ya somuso tödö ba sowuawua tödö ami ba we'amöi föna Keriso ma'ökhö andre. Ma'owai Ami fefu, : Ya'ahowu.
SATO : Ya'ahowu !
SA : Ya faofao khömi Lowalangi...
SATO : Ya fao Khöu Geheha-Nia
Fogaoni :
SA : Da ta'owuawua'ö dödöda wangondrasi Yehowa, da ta'omusoi'ö dödöda ba wamalua fasumangeta khö Lowalangi. Tasuno Ia, manunö ita moroi ba Mbuku Zinunö **numero : 28 ayati 1-2**

28. FOLAKHÖMI LOWALANGI

do = a 4/4

MM = 88 - 96

1. Folakhömi Lowalangi: Ama, Ono, Eheha.
Si Samösa Tölu Ia, no moroi ba mböröta.
Haleluya, Haleluya no moroi ba mböröta.
2. Folakhömi Lowalangi: no Razo Solomasi.
Lowalangi sangöhöli, sangorifi fefu soi.
Haleluya, Haleluya sangorifi fefu soi.

2. FANGA'ARO'Ö WA'OWULO (VOTUM)

- SA** : Da tahonogö dödöda ba wariawösa, ba ba wa hasambua khö Lowalangi, (Muzizio zato):
No owulo ita ba da'e ba döi Lowalangi Ama, ba ba döi nono-Nia Yesu Keriso, ba ba döi Geheha Ni'amoni'ö. Fangorifida ha ba döi Yehowa si no momböi banua si yawa awö danö.....

SATO : YADUHU

- SA** : Ba u'ila Zo'aya, si dadao ba dadaoma sebua, si no alawa: anönö gosali ahe mbaru-Nia, önö gafi zamösana. Dua mbalubalu mbawa ba dua mbalubalu gahe ba dua ba Wehombo. Ba faoma lamane-mane we'ao khö nawöra: Ni'amoni'ö, Ni'amoni'ö, Ni'amoni'ö Yehowa ngahönö andrö; no anönö lakhömi-Nia guli danö ma'asagörö. **HALELUYA.....**

SA : **Manunö : BZ. : 452**

Haleluya..... Haleluya..... Haleluya.....

SA : Mangandrö ita :

He Yehowa Lowalangi Ama, Ono ba Eheha Ni'amoni'ö. Möiga mangalulu ba wangandrö saohagölö me no Örorogö, Ö'orifi, ba Öbohouniga fa'omasi-Mö andrö. Ma'andrö khö-U, tohugö wa'ebua dödö-U khöma, rorogöga ba ngawalö de'ala, efa'öga ba wanandraigö, rara dödö bangawalö gabula dödö, tundrehehi faböi alau ndra'aga. Fatöröga ba zomasi Ndra'ugö irugi gamozua, fa makhamö nahia ba zi so Ya'ugö. Si lö mo'aetufa nisuna ba nifolakhömi Ndra'ugö, awö Zo,aya ya,aga Yesu Keriso ba Eheha Ni'amoni'ö, Yaduhu. (Mudadao zato)

3. MANUNÖ moroi ba Mbuku Zinunö Numero : 218 ayati 1-2

218. YA'E DÖDÖ

do = bes 4/4

MM = 76 - 84

2

1. Ya'e dödö, he Lowalangigu, si no momböi ya'ö.
Omasido, ufuli ndra'odo, enaö lö tekiko.
Ya'ö ni'osawuyu horö, Si no balunö hörö dödö.
Tema ndra'ö, he Keriso.
2. Usao'ö khö-U, utunö zalagu, ngawalö zinegu.
U'andrö khö-U, hagaini dödögu, soroi ba Geheha-U.
No oya zi tobini khögu, uwalinga tenga horögu.
Fehedegu, oi lö faudu..

4. FOMBASO TAROMA LI LOWALANGI FAMÖRÖGÖ (AF)

: Da tafondrondrongo daroma Li Lowalangi, tehalö moroi ba zura **Sinunö 113:1-9**

1. **Haleluya! Mi'anunö, ya'ami enoni Yehowa andrö! Misuno dōi Zo'aya!**
2. **Nisuno dōi Yehowa andrö, i'otarai da'e, ba irugi zi lö aetu!**
3. **I'otarai gatumbukha luo numalö ba gaekhulania, ba nisuno dōi Yehowa andrö!**
4. **Yehowa andrö, ba no salawa niha bö'ö fefu; ba italu'i mbanua si yawa lakhöminia andrö.**
5. **Ha niha zi fagölögölö khö Lowalangida Yehowa andrö? sidadao ba zalawa yawa andrö.**
6. **Ba sangide'ide'ö ya'ia, ba wamaigi banua si yawa ba tanö tou.**
7. **Samazawa si lö tōi, moroi ba danö, ba samaoso si numana, moroi ba dambu.**
8. **Ena'ö ifataro ba ngai zalawa, ba ngai zalawa mbanuania andrö.**
9. **Sangahonogö si lö ono baomo, si mane ina nono matua somuso tödö. Haleluya!**

Simanö daroma Li Lowalangi, da tatema'ö faoma sinunö: BZ.Numero 20:1

BZ. No: 20. MISUNOSUNO ZO'AYA

1. Misunosuno Zo'aya, mi bè zumange-Nia.
Mi'ebua'ö dōi-Nia, sotōi banua-Nia.
Me no Ikaoni göi ami, afu mitemawa'au ri, khö Yesu, Sangorifi.

5. FANGANDRÖ FANGEFA HORÖ

SA

: Ya'ami ira talifusö'

Na tawa'ö lö horöda, ba talimo ita, ba siduhu lö'ö ba dödöda. Na ta'ombakha'ö Horöda, ba lö faröi Ia, ba no satulö Ia,fa'i'efa'ö khöda horö andrö, ihaogö ita, awö wa'iheta fefu zilö atulö. Andrö da möi ita föna Lowalangi si fao fangidengide'ö ba wangombakha horöda, (muzizio ita fefu)

Mangandrö ita :

He Yehowa Lowalangi, si lö ambö fa'abölö, ba si no fahöna fa'omasi. Mafaduhu'ö wa tenga sinangea ndra'aga tanö föna-Mö, me no fahöna höröma si no mafalua i'otarai iraono ndra'aga, he ba wehedema, era'era dödöma, awö gamuatama si lö faudu ba daroma Li-Mö. Andrö möiga khö-U ba wangandrö fa'ahakhö dödö-U, ena'ö Ö'efa'ö khöma horöma andrö si no mafalua, irege sohahau tödö ndra'aga wanohugö fekolima ba zi so fönama si faudu ba zomasi Ndra'ugö. Hakhösi dödö-U khöma Ama, ba be'e aefa khöma horöma andrö ma'afefu, Yaduhu.

SATO

: Manunö : BZ. Numero 224 : 1

224. NA'UBINI'Ö HORÖGU KHÖ YESU

1. Na'ubini'ö horögu khö Yesu, ba lö usöndra zahono dödögu

U'ombakha'ö ngawalö horögu, mo lala dödö.

- SA** : **Turia Wangefa horö** : “Utayaigö golalöwamö, si mane lawuo, awö horöu, si mane sau. Tema fuli'ö khö-Gu, me no U'orifi ndra'ugö.
LAKHÖMI KHÖ LOWALANGI SI YAWA.....
- SATO** : Manunö:

450. BA FA'ATULÖ BA GULIDANÖ

1. Ba fa'atulö ba gulidanö ba niha ni'omasi'ö andrö

(mudadao zato)

6. FOMBASO TAROMA LI LOWALANGI FÖNA HUHUUO (AB)

- : Da tafondrondrongo daroma Li Lowalangi, tehalö moroi ba zura **Mataio 6:25-34**

25. Andrö uwa'ö khömi; Böi mi'abusi tödö nosomi, hadia mbalazomi, ba ma botomi, hadia nukhami. Tenga no ebua noso, moroi ba gö, ba tenga no ebua mboto, moroi ba nukha?
26. Mifaigi wofo andrö, ba dalu mbanua, lö manaru ira ba lö mamasi, lö mangöhöna ba halasa ira, ba ibalazoi ira Amami andrö, si so ba zorugo. Tenga no aröu faehu ami wofo?
27. Ba ha niha ba khömi zangila mondrou'ö fa'anau nosonia samba si'u, na i'abusi tödö?
28. Ba ba nukha, ba hana wa mi'abusi tödö? Mitöngöni ladari mböhö? andrö ba danö, he wisa wanöinia, lö mohalöwö ia, lö managu.
29. Ba uwa'ö khömi, lö si manö wa'asökhi nukha Zelomo, ba lakhöminia andrö fefu, si mane nukha zi sara da'ö.
30. Ba na imanö Lowalangi wamonukha du'u ba danö, si so ma'ökh? andre, nitibo'ö ba galitö mahemolu, ba tenga mendrua manö imanö khömi, ya'ami sambö famati?
31. Andrö böi mibusi dödümi ba böi miwa'ö: Ha ma'a? ma: ha mabadu? ma: ha ma'onukha?
32. A'oi sa ni'alui niha baero da'ö fefu; no'a sa i'ila Amami andrö, ba zorugo, wa soguna khömi da'ö fefu.
33. Mi'oföna'ö wangalui banua Lowalangi andrö, awö wa'atulö dödü andrö khönia, ba tebe'e nönnönnö dania khömi da'ö fefu.
34. Andrö böi mi'abusi tödö zoguna mahemolu; mahemolu tesöndra lala zabu dödü mahemolu. Noa manö wamakao zi sarasara ngaluo.

Ya'ahowu zamondrongo taroma li Lowalangi ba same'e ba dödü.

- SA+SATO** : Yaduhu

7. FASÖMBATA

- SA** : Iada'e tebe'e khöda ginötö ba wolohe fasömbata khö Lowalangi. Ta'osamuzaigö wame'e, he fasömbata si föföna, ba simanö göi zi mendrua awö zi medölu sifao fangowuloi ame'ela persembahan kasih. Ba si föföna ua da tafondrondrongo Li Lowalangi me imane:

- ❖ Same'e sumange fangandrö saohagölö, da'ö zamolakhömi Ya'odo, ba zi lö sinegu ba mbuabuania U'oroma'ö wangorifi andrö khö Lowalangi.

- SA** : Tafa'ema wasömbata khö Lowalangi, manunö ita moroi ba Mbuku Zinunö **Numero : 260 ayati 1-6**

260. NO OYA NITEMADA

do = es 4/4

MM = 88 – 96

1. No oya nitemada buala Zo'aya.
Sinangea ta'andrö saohagölö-Nia.

2. Botoda, ba nosoda talulu khö-Nia.
He lala halöwöda, ya sumange-Nia.
3. A'oi Ifahowu'ö halöwö dangada.
Ta'andrö saohagölö, zi no Ibè khöda.
4. Andrö mo'ömö ita wamè fasömbata.
Tabè sumange-Nia, moroi ba dödöda.
5. Ya'ugö gubaloma ba lala döröwa
Ba zomasi Ndra'ugö fatörö ndra'aga.
6. Ma'andrö khö-U So'aya rorogö ndra'aga
Sagötö fekolima ba fahowu'öga.

Na no awai la'owuloi/lafa'ema wasömbata, ba owulo tanö furi zangowuloi Fasömbata, lafendrongagö wolohe föna fasömbata, ba la'o'ö gofanöwa note zinunö (irama lagu).Fatua lö möi ira wolohe föna, ba imane Sangai Agendre:)

“Da tafasao wasömbatada andre föna Lowalangi,.....Muzizio ita fefu.....

Manunö ita moroi ba Mbuku Zinunö **numero : 261**

261. YA'E ZUMANGE

Ira'alawe

1. Ya'e zumange fasömbata, ma ' ohe sumange Yehowa.

Iramatua

- Reff* :Ma'andrö khö-U fahowu'ö zumange ni 'ohema khö-Mö
2. Ya'e zumange fasömbata mabe'e soroi ba dödöma.
Reff : Ma'andrö khö-U
 3. Ya'e zumange fasömbata buala si'otarai Nama.
Reff : Ma'andrö khö-U
 4. Ya'e zumange fasömbata, boto, noso, ba fa'aurima
Reff : Ma'andrö khö-U
 5. Ya'e zumange fasömbata, lö irugi zomasi dödö-U.
Reff : Ma'andrö khö-U
 6. Ya'e zumange fasömbata, ma'aohasi gölö Zo'aya.
Reff : Ma'andrö khö-U

FANGANDRÖ : (*Fangandrö nidönia'ö fasamösa zangowuloi fasömbata, aefa da'ö ba lafa'ema ba Danga zangai huhuo, itema'ö sangai huhuo awena itou'ö ba dete meza. Ba na so Wasömbata si sambua ni'ofulu, owasa wanaru ma owasavwamasi, btn ba itema'ö sangai huhuo si fao taroma Li Lowalangi si faudu ba wasömbata ni'owuloi andrö*)

8. KOOR/VOKAL GROUP

- SA** : Da tafaogö dödöda ba wanuno Lowalangi faoma sinunö ni'olohesi:
Koor ba Vokal Group
- a. Koor Jemaat
 - b. Kegiatan komisi bapak
 - c. Kegiatan sektor II
 - d. Kegiatan Koremda
 - e.

9. MANUNÖ

- SA** : Da tafa'anö dödöda wamondrondrongo taroma Li Lowalangi, manunö ita moroi Ba Mbuku Zinunö **numero 163**

163. UHONOGÖ SIBAI DÖDÖGU

1. Uhonogö sibai dödögu ba wamondrondrongo li-Mö Yesu
Mangalulu ndra'odo föna-U ba gametahö-Mö ia da'a
Öbayoini Eheha-U Yesu dozigö mbanua samati khö-U.
Ubokai dödögu khö-U Yesu nahia daroma li-U.
TaromaliMö lö fa'atebulö menewi ma'ökhö ba si'ogötö'ö lö sa mamalö.
Taroma li-Mö simöi fangabölö utema'ö soroi ba dödö, tolo ba wolo'ö.

10. HUHUAO SEBUA

- SH** : Ya'irorogö dödömi, awö gera'erami fa'ohahau dödö andrö, khö Lowalangi, Sabölö moroi ba gera'era niha fefu, ba khö Keriso Yesu. Mangandrö ita.....Yaduhu.
- Fombaso taroma Li Lowalangi **Amosi 9:11-15 / Amos 9:11-15** (*Tuho Migu: Yehowa zamohouni banua-Nia /Tuhan memulihkan umat-Nya.*) Fanuriagö
 - Nitanö ba dödö. **Amosi 9:13a / Amos 9:13a** (*Ba irugi bawa dania, iwa'ö Yehowa, ba ikhamö zamasi samaku, ba ikhamö zolazi bua nagu sanaru. / Sesungguhnya, waktu akan datang, demikianlah firman Tuhan, bahwa pembajak akan tepat menyusul penuai dan pengirik buah anggur penabur benih.*)
 - Fangandrö Fanga'aro'ö huhuo

SATO : **Manunö : BZ. Numero 154 : 1**

154. NO MAFONDRONDRONGO LIU

- No mafondrondrongo li-U, Lowalangi So'aya.
Tanö ba dödöma ia, fa böi olifuga.
Fahowu'ö ia khöma, ena'ö ohahau dödöma fefu.
Heta ba dödö zi lö sökhi, ma'o'ö niwa'ö-U.

11. TUHO WAMATI

SA : Me no tarongo daroma Li Lowalangi, ba da tafaogö Lida wamaduhu'ö famatida Ya'ita niha Keriso föna Lowalangi, muzizio ita fefu.....endronga lida

- SA+SATO** :
- ❖ Ya'ö mamati khö Lowalangi Ama si lö ambö fa'abölö, somböi banua si yawa awö danö.
 - ❖ Ya'ö mamati Khö Yesu Keriso, So'aya ya'ita, Ono Lowalangi si ha samösa, nitema nina-Nia Maria khö Geheha Ni'amoni'ö, Ono nono alawe Ia, no manaögö huku Ia, barö mbawa Fondrio Filato, teforöfa Ia, mate,ba lako'o. No möi Ia ba mbanua niha tou, no maoso Ia moroi ba ngai zimate me no irugi tölu ngaluo. No manahae Ia, möi ba zorugo, dumadao ba gambölö Lowalangi Ama si lö ambö fa'abölö. I'otarai da'ö mangawuli Ia dania ba wanguhuku niha sauri, awö zi no mate.
 - ❖ Ya'ö mamati khö Geheha Ni'amoni'ö, ba ufati ha sambua mbanua ni'amoni'ö, fefu niha Keriso, fa'awösa niha ni'amoni'ö, ba fangefa horö, ba femaoso mboto zimate, ba fa'auri si lö aetu. Yaduhu. (Mudadao zato)

12. ANGOMBAKHATA BA MBANUA NIHA KERISO

13. SA : Da tafondrondrongo angombakhata:.....

14. MANUNÖ

SA : Manunö ita moroi ba Mbuku Zinunö **numero: 470 ayati 1-2**

470. YESU SAURI

do = g 4/4
MM = 96 - 104

- Yesu sauri, so Ia ba dödögu.
Yesu sauri, so Ia ba dödögu.
Yesu sauri, so Ia ba dödögu,
Ya'ia zamatörö fa'aurigu.
- Yesu sauri, zamaeri fa'aurigu. 3 x
Andrö lö te'alado, lö elungu.

15. FANGANDRÖ SALAHI + FAMATENGE + HOWUHOWU

SH : Muzizio ita fefu, mangandrö ita :.....(tetohugö) : Ba döi Zo'aya ya'aga Yesu Keriso, Si no mamahaö ya'aga ba wangandrö mamane :

SH + SATO : He Ama khöma siso ba zorugo, ya te'amoni'ö döi-U. Ya tobali banua-U fefu niha, Ya itörö zomasi ndra'ugö, hulö ba zorugo, ya si manö göi ba gulidanö. Öma sirugi ma'ökhö be'e khöma ma'ökhö andre. Ba efa'ö khöma horöma, si mane fangefa'öma sala ba zi so sala khöma. Böi ohe ndra'aga ba wanandraigö, efa'öga ba zi lö sökhi. Me ya'ugö zamatörö banua-U, ba sokhö fa'abölö, awö lakhömi, irugi zi lö aetu. Yaduhu

SH : **FAMATENGE + HOWUHOWU** :
Mi'angawuli si fao fa'ohahau dödö, ya tobali ami sura Keriso, samaduhu'ö Ya'ia ba Lala wa'aurimi sero ma'ökhö, ba mitema (tatema) howuhowu Lowalangi :
❖ Ya mufahowu'ö ami/ita Lowalangi, Ya murorogö ami/ita
❖ Ya mufohaga mbawa-Nia Khömi/khöda, Ya mu'ebua'ö dödö-Nia khömi/Khöda
❖ Ya mufalembe hörö-Nia khömi/khöda, Ya mube'e wa ohahau dödö khömi/khöda fefu. Yaduhu

SATO : Manunö BZ.Numero **470 ayati 3**

470. YESU SAURI

3. Yesu sauri, gubalogu sindruhu. 3 x
Lö sambö ndra'o, lö göi fa'ata'u

SH : YA'AHOWU

SATO : YA'AHOWU